

* UDAKO EUSKAL UNIBERTSITATEA

IRUÑEKO UDALAK HARRERA OFIZIALA EGIN ZION ATZO UDAKO EUSKAL UNIBERTSITATEARI

Zinegotzien agurra UEUri

■ Udako Euskal Unibertsitatearen Iruñeko ikastaroak amaitzeaz direla Iruñeko Udalak harrera ofiziala egin zien atzo UEUko ikasle eta irakasleei. Iruñeko Udalaren eta UEUren arteko lotura azpimarratu zuten Pascal zinegotziak eta Aizpuru UEUko zuzendariak.

Eduñe Elizondo / Iruñea

IRUÑEKO UDALAK harrera ofiziala egin zion atzo Udako Euskal Unibertsitateari (UEU). Joaquín Pascual Kultura zinegotziak eta Udaleko beste hainbat kidek ongi etorria eman zieten arratsaldeko ordu batakoa josi Mikel Aizpuru UEUko zuzendariari eta ikasle eta irakasle ordezkariei —UEUko zenbait sailburu tartean—. Javier Chourraut Iruñeko alkateak hartu behar zuen UEUko ordezkariaren udaletxean baina zeregin hori Pascalen esku utzi zuen, azken honek azaldu zuenez, «tamalez, ezin izan baitu hemen egon».

Harrera ekitaldian Joaquín Pascalk eta Mikel Aizpuruk hartu zuten hitza zinegotzi eta UEUko kideen aurrean. Iruñeko Udaleko zinegotziak ongi etorria eman ondoren, Udako Euskal Unibertsitateak Iruñean eman dituen hogei urteak azpimarratu zituen, bertara hurbiltzen diren ikasle eta irakasle lan goraituz: «Ez da lan egiteko eta ikasteko sasoirik onena baina UEU, jada, Sanferminen ondorengo Iruñeko zati bilakatu da», erran zuen. UEUko ikastaroen kalitatea ere nabarmendu zuen.

Iruñeko Udalaren eta UEUren arteko elkarlana izan zuen mintzagai zinegotziak, bestetik. Pascalk —eta baita Mikel Aizpuruk ere— gogoratu zuenez, uztaileko ikastaroak antolatzeke ezazik, udaberrian Nafarroako Unibertsitatean egin zirenak prestatu ahal izateko ere Iruñeko Udalaren laguntza jaso zuen UEUk. Ez da aurtengoa, gainera, lehen aldiz izan. Joaquín Pascalk, halaber, Iruñeko Udalak UEU bultzatzen jarraitzeko borondatea duela jakinarazi zien bertan bildutako, «halaxe izan baita beti, Udalean zein talde dagoen kon-tuan gartu gabe».

«Positibotzat» jo du Aizpuruk aurtengo ekitaldia. ■ Aizpuru UEUko zuzendariak ere, Udalen harrera eskertu eta Nafarroako eta Iruñeko ikasle eta irakasleek Larraonako ikastetxean duten presentzia nabarmendu zuen. Erran zuenez, ikasle eta irakasle artean, ehun bat nafarrek hartu dute parte aurtun UEUn. Iruñeak UEUrentzat duen garrantziaren adierazgarri, azkenik, hiri honetan ikastaroak hainbeste urtez antolatu izana azpimarratu zuen Aizpuruk: «UEUk 25 urte beteko ditu datorren urtean, eta horietako 20 Iruñean eman ditu. Hainbat urte igaro ondoren, halako harreraren bidez ikusten dugu UEUk zer bait



Pascual Kultura zinegotziak hartu zituen UEUko kideak Iruñeko udaletxean.

ELENA ASTIGARRAGA

eskaini diola Iruñeari, UEU zer bait dela Iruñeko bizitzan eta hori pozgarria da».

UEUko aurtengo XXIV. ekitaldia hilaren 15ean hasi zen Iruñean eta larunbatean amaituko da. Ikastaroak, hala ere, gaur

arratsaldean bukatuko dira. Gau partean, afaria egingen dute urtero lege, Iruñeko ikastaroak agur errateko. Eta amaiera ailegatzeko den besteetan bezala, balantze egiteko ordua iritsi da. UEUko arduradunek gaur betan

eskainiko dute prentsurrekoa Larraonan.

Mikel Aizpuruk aurreratu digunez, hala ere, «positibotzat» jotzen du berak zuzendutako UEUko lehen ekitaldi hau, «guztietan jendetsuena». X

Intermodalaren hirugarren proiektua aurkeztu du Diputazioak hamar urtetan

■ Hiru enpresa pribatu proiektua finantzatzeko prest agertu dira

Gorane Agirre / Bilbo

MARTIN MARTINEZ Bizkaiko Garraio diputatuak azken hamar urteotan Bilboko Abandoko Geltoki Intermodalaz egin den hirugarren proiektua aurkeztu du. Dena dela, oraingo ez dago Michael Wilford arkitekto britainiarren proiektuaren eraikuntza lanak hasteko egun finkorik, ezta hauen iraupenari buruzko zehaztasunik ere.

Intermodalaren proiektuak, orotara, 40.000 milioi pezetako inbertsioa (1.600 milioi libera inguru) behar du. Hala ere, zenbait ikerketa ekonomikoren arabera, Administrazioak 13.000 milioi pezetako gastuari egin beharko dio aurre, ekimen pribatuak gainontzeko 27.000 milioi pezetak finantzatzeko dituen.

Foru Aldundiak ziurtatu zuenez, dagoeneko hiru enpresa pribatu prest agertu dira Bilboko Intermodalaren geltokiaren eraikuntza finantzatzeko. Baina

Martin Martinezek ez zuen hiru promotore independente horien izena jakinarazi nahi izan.

Garraio diputatuak adierazi zuenez, une honetan Administrazioari dagozkion 13.000 milioi pezetak finantzatzeko eredu posiblei buruzko behin-betiko azterketaren zain daude. AB Ase-sores enpresa lantzen ari den azterketa datorren irailean plazaratu daiteke.

Behin txostena esku artean izanda, instituzioen partaidetza ekonomikoa aztertuko da. Dagoeneko, Eusko Jaurlaritzak Bizkaiko Diputazioak adinako gastuari aurre egiteko konprometua hartu du bere gain. Bestalde, Madrilgo Gobernuari dagokionez, baliteke bere partaidetza lurtzoruaren ematean gauzatzea.

Gauza hauek guztiak zehaztu ostean, Administrazioak lanak adjudikatzeko baldintzak lantzeko, «agian 1997. urtean», Martinezek adierazi zuenez.

Abandoko Geltoki Intermodalak egun Bilbon zehar sakabana-tuta dauden hiri barruko eta hiriarteko autobus zerbitzuak, FEVErentzako tren geltoki berria eta Renfeko geltoki berri eta handiagoa bilduko ditu bere baitan. Garraio zerbitzu hauek guztiak Bilboko metroarekin lotuko dira zuzenean.

Aldi berean, proiektuak bestelako zerbitzu batzuk ere eskainiko ditu, esate baterako, ferrya eta Sondikako aireportuaren bulegoak, taxi zerbitzuak, aparkalekuak (2.187 plaza) eta Abiadura Handiko Trenaren abiapuntua.

Eraikina etxebizitzek, bulegoek eta merkataritza lokalek osatuko dute.

Hamarkada batean Intermodalaren hiru proiektu landu badira ere, Michael Wilford arkitektoak nabarmendu zuenez «hasierako proiektua ez da aldatu; hala ere, hirugarren eta bostgarren erreala dituen bakarra». X

Bilboko Ostalaritza Eskolako ikasketak abalatzeko eskatu diote Euskal Herriko Unibertsitateari

■ Eusko Jaurlaritzako Turismo sailburuordeak bere egin du eskaria

Erredakzioa / Bilbo

ENPRESA Turistikoen Kudeaketa eta Ostalaritzako Goi Eskolako Partzuergoak Bilboko Artxandan dagoen zentro honen ikasketa programa abalatzeko eskatu dio Pello Salaburu Euskal Herriko Unibertsitateko (EHU) errektoreari. Javier Blanco Eusko Jaurlaritzako Turismo sailburuordeak bere egin du Ostalaritzako Goi Eskolako Partzuergoaren eskaria.

Aipaturiko Partzuergoan erakunde guzti hauek daude ordezkatuak: Bizkaiko eta Espainiako ostalaritza sektoreko enpresari nagusiak, Bizkaiko Foru Aldundia, Bilboko Udal eta Iberdrola enpresa pribatua.

Partzuergoak Euskal Herriko Unibertsitateari egin dion eskarian jasotzen denez, «Enpresa Turistikoen Kudeaketa eta Ostalaritzako Goi Eskolako ikasketa egitaraua, bere instalazioak eta irakasle gaitasuna goi mailako irakaskuntzakoak dira, jadanik graduatu diren hiru promozioetako ikasle ezaugarriak eduki egiazatu duen bezala».

«EHU gure ikasketa egitaraua abalatzeko eskatu digu industri turistiko bultzatzeko premia dela kausa, bereziki ostalaritza sektoreko unitate produktiboak. Heziketa, lehiakortasunaren oinarritzako faktorea, ostalaritza sektorearen gabezia izan da, batez ere goi mailako heziketa espezializatuari dagokionez», azaldu zuten Partzuergoko ordezkariak.

«Sektorearen goi mailako prestaketaren eskariak bat egin du gizaritearen eskari gero eta handiagoarekin», gehitu zuten, «orain arte ikasleek Frantzia, Erresuma Batua edota Suitzara joan behar izaten zuten ostalaritza enpresen kudeaketa prestatzeko».

Artxandako Enpresa Turistikoen Kudeaketa eta Ostalaritzako Goi Eskola duela bost urte eratu zen, Bizkaiko Ostalaritza Enpresarien Elkartearen ekimenez. Zentro honek American Hotel & Motel Association erakundeko Educational Institututeren ikasketa programa eta metodologia eskaintzeko baimena du iragan otsailetik.

Eskola honetatik atera diren ikasle % 90ek baino gehiagok, dagoeneko, lanpostua aurkitu dutela azpimarratu zuten Partzuergoko ordezkariak. Ikasleok Euskal Autonomi Elkartean (EAE), Espainian eta atzerrian —bereziki Frantzia eta Erresuma Batua— egiten dute lan. X